

佛說息除賊難陀羅尼經

宋三藏法師法賢奉詔譯

如是我聞一時佛在摩伽陀國與諸大衆圍遶經行到於菴羅樹園側韋提呬山帝釋巖中時尊者阿難忽見大惡賊衆遙遠而來見已生大恐怖心懷憂惱身毛皆豎時尊者阿難疾往佛所到已合掌而白佛言世尊我今遙見有大惡賊唯願世尊爲作救護爾時世尊聞尊者阿難言已告阿難言汝怖賊耶阿難白佛言甚怖世尊佛言阿難汝勿得怖我有陀羅尼能除賊難是時尊者阿難聞佛語已心生歡喜作如是言唯願世尊爲我宣說爾時世尊即說大輪結界陀羅尼曰

怛_{下切}毖_{下同}他_一阿_二煬路哥_二鉢囉路計_三伊該阿提鉢底_四藕_引哩_引嚩_引駄_引哩_五贊_引哩

六摩登儼_七惹_八虞哩_八補哥細_九

爾時世尊說是陀羅尼已告尊者阿難汝今可往以此陀羅尼面十二由旬當作結界令得安隱息除賊難乃至刀劍器仗等悉不能侵又復能令彼諸惡賊不離本處旋如陶家輪又復阿難若人遇賊難時當用淨白線以此陀羅尼加持七徧結作七結過難即解所有賊衆皆如禁縛不能爲難爾時世尊說是經已尊者阿難及諸大衆聞佛所說皆大歡喜信受奉行

佛說息除賊難陀羅尼經